

वामदेवो गौतमः। इन्द्राबृहस्पती। गायत्री

इदं वा॒मा॒स्यै ह॒विः प्रि॒यमिन्द्रा॒बृहस्पती॑। उ॒क्थं म॒दश्च॑ शस्यते ॥ ४.०४९.०१

इदम्- एतत्। प्रियम्। हविः- चरुपुरोडाशध्यानभावनादिकं हविः। वाम्- युवयोः। आस्ये- मुखे। समपये। इन्द्राबृहस्पती- इन्द्र ईशनाधिदेवता। बृहस्पतिर्मेधाधिदेवता। उक्थम्- मन्त्रः। मदः- रसः। च। शस्यते ॥१॥

अ॒यं वां॑ परि॒ षिच्यते॒ सोमं॑ इन्द्रा॒बृहस्पती॑। चा॒रुर्म॒दाय॑ पी॒तये॑ ॥ ४.०४९.०२

इन्द्राबृहस्पती। मदाय पीतये- तृप्त्यनुभूतये। अयम्- एषः। चारुः- कल्याणः। सोमः- रसः। वाम्- युवयोः। परि सिच्यते ॥२॥

आ न॑ इन्द्रा॒बृहस्पती॑ गृ॒हमिन्द्र॑श्च गच्छतम्। सो॒मपा॑ सोम॒पीतये॑ ॥ ४.०४९.०३

इन्द्राबृहस्पती- इन्द्रश्च बृहस्पतिश्च। सोमपा- रसानुभवकरौ। सोमपीतये- रसानुभूतये। नः- अस्माकम्। गृहम्- सदनम्। आ गच्छतम् ॥३॥

अ॒स्मे इन्द्रा॒बृहस्पती॑ र॒यिं ध॑त्तं शत॒ग्विन॑म्। अ॒श्वान्तं॑ स॒हस्रि॑णम् ॥ ४.०४९.०४

इन्द्राबृहस्पती। अस्मे- अस्मदर्थम्। शतग्विनम्- प्रभूतगतिम्। अश्वान्तम्- तुरगोपेतं प्राणोपेतम्। सहस्रिणम्- अनन्तम्। रयिम्- दानयोग्यधनम्। धत्तम्- धारयतम् ॥४॥

इन्द्रा॒बृहस्पती॑ व॒यं सु॒ते गी॒र्भिर्हवामहे॑। अ॒स्य सोम॑स्य पी॒तये॑ ॥ ४.०४९.०५

इन्द्राबृहस्पती। वयम्। सुते- रसे निष्पन्ने। अस्य- एतस्य। सोमस्य- रसस्य। पीतये- अनुभूतये गीर्भिः- मन्त्रैः। हवामहे- आह्वयामः ॥५॥

सोममिन्द्रा॒बृहस्पती॑ पि॒बतं॑ दा॒शुषौ॑ गृ॒हे। मा॒दये॑थां तदौ॒कसा॑ ॥ ४.०४९.०६

इन्द्राबृहस्पती । दाशुषः- दातुः । गृहे- सद्ने । तदोकसा- तद्ब्रह्मनिवासिनौ भूत्वा । सोमम्- रसम् ।
पिबतम्- अनुभवतम् । मादयेथाम् ॥६॥